

Combersacionnan ta tuma luga riba e contracto

CITGO tin speransa cu e por traha hunto cu Aruba

*Informacion na momento di preocupacion pa combustibel local

*Halto riesgo di e acuerdo tambe lo wordo discuti

ORANJESTAD(AAN)--

Informacion cu a drenta di Citgo Petroleum Corporation na Merca, ta duna confirmacion cu e compania ta den contacto cu Gobierno pa discuti e contracto.

Segun e compania noticiero Reuters, e declaracionnan a ser haci dor di e gerencia di Citgo despues cu gobierno a anuncia cu nan ta bay forma un comision pa dicidi riba e refineria,

Segun Citgo nan ta sostene combersacion activo cu nan counterparts na Aruba y nan tin confiansa cu nan lo yega na un solucion pa traha hunto den futuro. Na ki forma esaki lo sosode, no a wordo bisa.



Na Aruba mes DIARIO a wordo informa cu tin preocupacion pa yega na un pronto decision na prome luga riba futuro di entrega di combustibel den e situacion mundial actual.

Despues cu Citgo a duna indicacion anteriormente cu e no ta sigui cu e proyecto local, tabata tin temor teniendo cuenta cu e crisis creciente mundial cu gobierno mester accelera su consulta local na

nivel nacional pa dicidi kico ta haci cu entrega di combustibel na Aruba.

Mientrastanto tambe ta surgi bosnan na Aruba pa cuminsa haci calculacion di e parti financiero di e proyecto, cu te awor a costa Aruba hopi placa.

Den publicidad hopi bes ta referi na loke Citgo mester inverti, pero ta lubida cuanto e negociacionnan y e estructura cu mester a crea, ta costa Aruba.

Informacionnan ta tene cuenta cu en todo caso lo mester bolbe negocia e contracto pa deshaci di partinan peligroso. Tambe mester tene cuenta cu e problemanan cu Citgo tin cu su

propio debenan mescos cu interes cu na e momento aki Guaidó mester paga pa cubri interes di e debenan cu tin Citgo como borg.

Finalmente sigur lo mester bay tene cuenta cu hustamente e situacion politico na Venezuela y e peligro grandi cu Citgo na Merca mes ta core como borg pa debe di PDVSA y di Venezuela mes.

E situacion no ta facil segun informantenan na Aruba, cu ta sigui muestra riba e riesgo halto di e proyecto y tambe necesidad pa awor na un forma uni Aruba atende e acuerdo cu a wordo negocia y atendi na nivel politico den un grupo chikito.